

**GLOSSA**

# Soluziuns pragmáticas

DAD ANDREAS CADONAU / ANR

**L**udaivlas intenziuns gubernamentalas èn senz'auter da chattar en la resposta da la regenza grischuna vers la dumonda parlamentara dal deputà Tobias Rettich publitgada avant paucs dis. Il deputà è s'interessà a chaschun da la sessiun parlamentara dal favrer passà per las pussai-vladads d'introducir la translaziun simultana en il cussegli grond. Dal reminent in deputà da lingua tudestga. El ha fatg sia dumonda per eventualmain pussibilitar a deputadas e deputads da far diever da l'atgna lingua materna en la debatta. Las ludaivlas intenziuns guvernamentalas exprimidas en la resposta al deputà pertutgan per empel l'avis da la regenza al consens da vulair impunder ils stgars meds finanzials a disposiziun a la promozion linguistica là nua ch'els pon avair il pli grond effect. Preziada regenza grischuna, lubi la dumonda tge pomai ha ina translaziun simultana en in parlament da far cun promozion linguistica? Fuss forsa interessant dad intervegnir dals ulteriurs chantuns bilings sche lur translaziun simultana en lur parlaments figurescha sut promozion linguistica.

**L**a constituziun grischuna stipulescha sut artigel 3 l'egalitat da las trais linguas tudestg, rumantsch e talian. La dumonda dal deputà sche la regenza grischuna vesia en la pratica linguistica actuala dal cus-



segl grond in dischavantatg visavi deputadas e deputads da lingua taliana e rumantscha ha la regenza respondi tranter auter cun menziunar la realisabladad practica dad ina translaziun simultana. La regenza constatescha che translatar votums en in parlament cun trais linguas saja bler dapli in complex ch'en in parlament cun duas linguas. E la regenza na vesa insumma betg ina soluziun pragmatica per ina translaziun simultana en il cussegli grond, la regenza grischuna vesa ina translaziun simultana en il cussegli grond per fitg complexa e cumbinada cun auts custs.

**E**n verdad è la situaziun linguistica en il chantun Grischun fitg simpla e quella situaziun vegn resplendida en il cussegli grond ch'è dal reminent betg sulet in club da passatemp, mabain la pli impurtanta instanza politica e statala sper il suveran. Incumbensa da discutar e decider la legislaziun da noss chantun cun representanza da l'entir chantun. Per turnar tar la complexitad da la situaziun lingui-

stica grischuna. Fertant che deputadas e deputads da lingua rumantscha e taliana chapeschan tudestg na chapescha la gronda maioritad da deputadas e deputads da lingua tudestga ni rumantsch ni talian. Ina situaziun linguistica reala en il chantun Grischun è lunsch davent da cumplexitad. Bun, pia dovria sulet ina translaziun dals votums rumantschs e talians en la lingua tudestga ed i dovria en quel cass sulet duas translaturas ubain translaturs engstagl da sis respectiv duesch sco postulà da la regenza grischuna en la resposta al deputà. Per la pretensiun da la regenza grischuna da stuair midar translatura u translatatur suenter in'ura lavur en il cussegli grond han ins en vista da blers votums da deputadas e deputads tutta chapientscha. Il problem nun èn en quel cass las minoritads linguisticas grischunas, mabain la maioritad, els na chapeschan betg las linguas da lur cumpatriots grischuns. La translaziun simultana dals votums talians e rumantschs en il cussegli grond custa sin fundament da las calculaziuns da la regenza publitgadas en la resposta al deputà Rettich per onn 50 000 francs. Tantar soluziuns pragmáticas. In'altra dumonda che pertutga main la represchenanza da lingua taliana en il cussegli grond, mabain pliost la rumantscha. Èn els insumma pronts da discurrer rumantsch era sche lur votums vegnan translatads simultan per tudestg?